

EUR GENTEL VAD

59

**Diviz entre al Logoden goz, al Logoden vihan
hag ar C'has**

Al Logoden vihan

Me 'meuz gwelet...

Al Logoden goz

Petra, merc'hik ?

Al Logoden vihan

'Tremen du-hont gant eur pez kik
Eur pikol loen, d'ean blev gwenn
Ha diskouarn hirr war e benn.

Al Logoden goz

Al loen-ze, merc'h, 'zo eun treitour
Daoust d'e vlev gwenn ha d'e veg flour.

Al Logoden vihan

Oh ! na koant eo !... Sell-han du-hont !
Tost d'han, mamm gez, me 'ia da vont.

Ar C'has

Ia ! ma loenik, ia ! deut ama
Deut, ma elik, d'ober d'in « a »
M'ho kar, ia, ia ! deut mignonik !
M'ho kar, m'hen tou, ma c'halonik.

Al Logoden goz

Tec'bet, bugel : komzou treitour
A lavar d'ac'h hon enebour.

Al Logoden vihan

Ma mammik kez, c'houi re zisfi
Deuz al loen-ze ken mad ha ni !

Ar C'has

Deut ma merc'hik, me 'meuz em dorm
Eun dra lugernuz 'vel askorn,
Eun dra gwenn-gwenn, eun dra mad-mad,
'Vel na gavfet ket 'ti ho tad.

Al Logoden goz

Tec'het, bugel, ma chilaouet !

Al Logoden vihan

Perak, mammik, oc'h ken nec'het ?

Ar C'has

Perak ouz-in ho pefe aon ?

'Po droug ebet, n'am euz ket naon !

Al Logoden goz

Oh ! gwasat kaz eo ar c'haz-man !...

Na chilaouet ket anean.

Al Logoden vihan

O ma Doue ! petra rin 'ta ?...

C'hoantek ha dic'hoant on brema...

Al Logoden goz

Eur lamp hepken, ma bugelik,

War an tu-ze, ho kollfe mik.

Ar C'has

Nan, nan, bugel, 'po droug ebet,

M'ho kar ervad, deut, deut bepred !

Al Logoden vihan

Sethu me et... Allaz ! koll't on

Aou ma fenn !... Aou, aou 'ta, poezon !

Aou, ma c'halon, lac'het on-me !

Gan-ac'h oa, mamm, ar wirione.

KELENNADUREZ :

Deuz tad ha deuz mamm, bugale,

Zentet, hag ho po hirr-vue ;

Doujomp ive, ni kristenien,

Doujomp bepred d'hon Beleien,

Rag out-e mar na zentomp ket

Gant tud an diaoul ni 'vo taget.